

Iluarsiissut

28.05.2026-mi akissuteqaammut immikkoortoq 52-imut taarsiutaasoq

(Naalackersuisoqarfiup aqqa, Naalackersuisup aqqa kiisalu imarisaanut tunngatillugu allannguutit iluarsineqarput. 'najugaqarfiit' 'angerlarsimaffik'-imik taarserneqarpoq, 'najugaqarfiit' peerneqarpoq, kiisalu 'Naalackersuisut aamma immikkoortoq 173 tapersersorpaat' ilanngunneqarput.)

Inummut ulorianartorsiortitsisumik pinerluttarnerup meeqqat inuusuttullu 18-nit inorlugit ukiullit akornanni annertusigaluttuinnartup pinaveersaartinnissaa siunertaralugu, suliniutit suut aallartittariaqarnersut pillugit apeqquteqaat aallaavigalugu siunnersuut.

(Inatsisartunut ilaasortaq Bo Martinsen, Demokraatit)

Akissuteqaat

(Meeqqanut, Inuusuttunut, Inatsisit Atuutsinneqarnerannut Naligiissitaanermullu Naalackersuisoq)

Siullermeerneqarnera

Inatsisartunut ilaasortap Bo Martinsenip Demokraatineersup sammisap matuma pingaarutillip oqaluuserineqarnissaanut iliuuseqarsimaninnut qujanaq.

Meeqqat inuusuttullu pinerlineqartut pinerluttutullu akuunissamat illersorneqarnissaat qitiusumik suliaasaasoq Naalackersuisunit isigineqarput. Inuusuttut 18-it inorlugit ukiullit akornanni inummut ulorianartorsiortitsisumik pinerlunnerit ernumanarluinnartuusarput, tamannalu siunnerfilimmik, suleqatigiiffiusumik tamakkiisumillu iliuuseqartariaqalersitsivoq.

Pinaveersaartitsineq meeqqat inuusuttullu sumiiffigisartagaanni aallaaveqassaaq: angerlarsimaffimmi, atuarfimmi, sunngiffimmi inuunermi internetsikkullu. Ataatsimoorfiit atugarissaanermik, akisussaaffeqarnermik allanullu ataqqinninnermik siuarsaasut pitsanngorsassavagut. Ilutigitillugu inuusuttunut atugarliornermik, killissanik qaangiilluni pissusilersornernik imaluunniit pinerlunnialernernik ersiuteqartunut pissarsiariuminartumik piukkunnartumillu tapersersuisinnaasoqarnissaa qulakkiissavarput. Inummut sammititamik pinaveersaartitsineramik suliniutit arlallit nassaassaareerput, taakku inuusuttunut ataasiakkaanut pingaarutilimmik allannguisuupput. Taakkunanga ilaatigut sulisunik ilungersuussilluartunik pilersitsisoqarnikuunera erseqqissassallugu pingaaruteqarpoq, taakkumi inuusuttunut qajannartumi inissisimasunut peqqinnartumik ineriartortitsisumillu maligassiuisunik tarrasorfigisinnaasaminnik tunisisuupput. Aammattaaq Qamani-periusissiami inummut sammititamik pinaveersaartitsinerit aallunneqarput. Ilutigitillugu pinaveersaartitsineq inuit peqqissuunissaannut periusissiamut Inuuneritta III-mut ilaavoq, tassani tarnikkut peqqissuuneq inuiaqatigiinnilu ataatsimoorfiit pingaarutilimmik inissisimanissaat qitiutinneqarput. Kommunini arlalinni Kalaallit Nunaanni Politiit suleqatigineqarput, sumiiffinni ingerlataqartut inuusuttut aarlerinartumiittut nassaarinissaat tapersersornissaallu suleqatigiissutigineqarlutik. Iliuuseqarnerit taakku suliaasaqarfiit ilaanni inuusuttut pinerluttarnerisa ikilinerannut iluaqutaasimapput, taakku politiit pinaveersaartitsineramik suliaqarnerannik isumaginninnikkullu ingerlatsineramik taperserneqarput.

Kisiannili ilusilersorluakkamik pinaveersaartitsinerup qitiutinneqarnerata annertusineqarnissaa pisariaqartinneqarpoq. Uani pineqartut tassaapput siusissukkat iliuuseqarneq, imigassamat politikki nutaaq, pitsaasunik toqqissisimanartunillu angerlarsimaffeqarneq, ulluunerani paaqqinnittarfinnut immikkoortoq

patajaatsoq meeqqallu atuarfiat ingerlalluartoq – taaneqartut tamarmik aalajaatsumik peroriartornermut, atugarissaarnermut, imminut naleqassutsimut, siunissamut neriulluarnermut isumaqarluartumillu misigisaqarnermut tapersiisuupput. Ilusilersorluakkamik pinaveersaartitsineq suliaasaqarfiuvoq eqqumaffigineqarnerujussuusariaqartoq uagullu inuiaqatigiittut patajaallisinnissaanut siunnerfilimmik sulissuteqarfigisariaqagarput. Inuiaqatigiinnik pitsaasunik toqqagassaqarfiusumik sanarfinissaq pineqarpoq – tamatumunngalu pinaveersaartitsineq piffissamut ungasissumut isiginniffiusoq ilusilersorluagarlu pisariaqarpoq.

Naalackersuisut ilaqutariit tapersorsorneqarnissamik pisariaqartitsisut pisariaqartitaminnik ikiorneqassasut pingaartilluinnarpaat. Ilaqutariit nukittorsarnerisigut inuusuttut pinerlunnerunngitsumik toqqagaqarsinnaanerannut aamma nukittorsarsinnaavagut. Peqatigisaanik inuiaqatigiittut suleqatigiinnissarput ilusilersorluakkamillu pinaveersaartitsinerup siuarsarnissaanut ataatsimoorussamik akisussaaffimmik tigusinissarput pisariaqarpoq. Uani pineqarput sinaakkutinik aalajaatsunik toqqissisimanartunillu pilersitsineq, meeqqanut, inuusuttunut ilaqutariinnullu suliaasaqarfiup iluaniinnaanngitsoq, kisiannili ilinniartitaanermut peqqissutsimut ineqarnermullu suliaasaqarfiit akornanni. Meeqqat inuusuttullu tamarmik inuunermik isumalimmik, neriuutilimmik pitsaasunillu toqqaanertalinnik tuninissaannik iluatsitsissagutta, tamatumunnga ilusilersorluakkamik pinaveersaartitsinermut piffissamut ungasissumut isiginnittumik tunniusimaneq siammasissumillu suleqatigiinneq pisariaqarpoq.

Naalackersuisut aamma immikkoortoq 173/2026 tarnikkut peqqinnerulernissamut periusissiornissamik siunnersuut tapersorsorpaat. Oqalliluarisi, qujanaq.